

Nü tla Rai TV Ladina

Sport Ladin - mensil de sport dles valades ladines



Le pilot Erich Prinoth, le journalist sportif Diego Clara y le team manager de MP Racing Massimo Pepe.

Televijiun - Cun l'avèi ciafè plü lerch por les trasmisciuns ladines tla Rai, à la seziun di programs podü slarié fora inçe l'orizont de contegnüs che ti vëgn pità al publich. N argomënt che mancià cina sègn te na mosöra maiù, mo che à na gran importanza y n gran pëis tla sozieté ladina, é le sport. Y chilò ne baiunse nia ma di gran campiuns ladins a nivel internazional, desco Carolina Kostner, Manfred y Manuela Mölgg, Cristian Deville, Stefano Gross, Michela Ponza, Evelyn Insam y tröc d'atri, mo dai cënc y miles de ladins che fej sport a nivel amatorial. Le jüch al palè é present te prësc vigni païsc, le sport di schi inçe, spo unse de gran realtès tl hockey, tl tennis, por fà ma val' püc ejèmpli. Döt chësc y tröpes d'atres disciplines

ciafarà porchël sègn lerch inçe tla televijiun. Le pëis ti gnarà efetivamënter dè al sport amatorial, chël che ne vëgn zënza nia mostrè ti media. I resultač internazional, chë vëgn comunicà tresfora da duc i media regionai, nazional y internazional, arà n post marginal. N gran potenzial vëiga l'autur dla trasmisciun, Diego Clara, tles informaziun de "backstage": "Nos ùn contat diret y personal cun tröc sportifs ladins, cun alenadus y funzionars de clubs y porchël podunse ti pitè a nüsc spetadus gonot inçe stories y noles, che degügn d'atri ne n'à o che ai ciafarà impormò dedò - y chësc ti darà gran valüta y prestisc a nosta trasmisciun". La trasmisciun dal titul "Sport Ladin" jarà en ona por le pröm iade en mertesc, ai 15 de

otober, dales 20.50 söla Rai Tv Ladina y spo dedò vigni secundo mertesc dl mëis, da otober cina de jügn. Tratan i mëisc de jenà y forà sarà bonamënter 2 iadi al mëis, deache al é deplü apuntamënc importanc, dantadöt les olimpiades da d'invern a Sochi tla Ruscia. "Sport Ladin" dess spo te na secunda fasa inçe gnì publiché sön i media eletronic: "I ciariarun sö vigni trasmisciun inçe sön n canal YouTube aposta, por che i apascionà de sport pois ti ciarè canche ai ò, do che ara é jüda en ona tla Rai. Plü inant é spo inçe odü danfora na plata Facebook y na plata internet, che dess portè tresfora noles de sport ladin, danter na puntata y l'atra dla trasmisciun instëssa", dij Diego Clara, che se conforta dassënn ala pröma assoluta dla proscima edema. I temesc prinzipai sarà la partida te cïasa dl AC Fascia de jüch al palè, la squadra ladina che söga le plü alalt de dotes tla promoziun da Trënt. La secunda reportaja é gnüda tuta sö a Imola, olache Erich Prinoth da Urtijëi à fat de bogn resultač pal Ferrari Challenge cun la squadra MP Racing de Massimo Pepe che vir te Sëlva. Laprò noles en cört te "sport compat" y na agenda cun i apuntamënc sportifs plü importanc dles proscimes edemes. La trasmisciun dora danter 12-14 menüç. Sport Ladin - mertesc 15 d'otober, dales 20.50, Rai TV Ladina y dedò sön YouTube.